

# Pelabuhan laut dalam ancam penduduk, nelayan

Um 6/2/2023 MS:32

Oleh MUHAMMAD  
SHAHIZAM TAZALI  
utusannews@mediamulia.com.my

**MELAKA:** Beberapa pertubuhan bukan kerajaan (NGO) dan wakil penduduk terjejas mahu kerajaan negeri mempertimbang semula cadangan projek tambakan laut terbaharu bagi membina pelabuhan laut dalam dan terminal pelayaran di Melaka.

Ketika ditemui *Utusan Malaysia*, Pengerusi Jawatankuasa Tindakan Selamatkan Komuniti Portugis Melaka, Martin The-seira berkata, penduduk tidak menentang pembangunan, sebaliknya proses itu harus

direncanakan dengan sebaik mungkin agar menjamin kelestarian terhadap alam sekitar dan masyarakat.

Menurutnya, komuniti nelayan terutama di kawasan Parit Cina sangat kecewa apabila setiap tahun jumlah tangkapan mereka semakin merosot.

“Saya juga seorang nelayan. Tangkapan ikan merosot hampir 65 peratus jika dibandingkan 30 tahun lepas. Semakin lama projek ini berjalan, semakin terjejas pendapatan kami.

“Udang geragau semakin sikit, ikan gelama dan ketam bunga sudah kurang. Nelayan terpaksa pergi jauh ke tengah laut untuk menangkap ikan dan

kami terpaksa menanggung kos tambahan seperti petrol dan menggunakan enjin yang sesuai,” katanya.

Terdahulu *Utusan Malaysia* melaporkan, beberapa NGO, penduduk bersama Ahli Parlimen Kota Melaka, Khoo Poay Tiong menghantar surat bantahan ke Jabatan Alam Sekitar (JAS) berhubung Laporan Penilaian Kesan Alam Sekitar (EIA) projek tebus guna tanah seluas 1,190 ekar bagi pembinaan pelabuhan laut dalam ber taraf antarabangsa dan terminal pelayaran.

Sementara itu, seorang penduduk, Hairil Anuar Samat, 52, berkata, dia kini sudah me-

ngumpul lebih 100 tandatangan penduduk sekitar Padang Temu, Telok Mas dan Alai yang membantah cadangan projek tambakan laut itu.

Katanya, kawasan di sekitar Crystal Bay sendiri kerap berlaku bencana banjir yang teruk sehingga mengakibatkan kerugian harta benda kepada penduduk setempat.

“Masyarakat kampung sangat mengharapkan projek berkenaan tidak diteruskan oleh kerajaan negeri untuk kebaikan bersama. Alam sekitar di pesisir pantai sedia ada sudah terjejas dan jangan ditambah kesan negatif daripada pembangunan baharu,” jelasnya.



**KEADAAN** lokasi persisiran pantai yang menjadi laluan keluar dan masuk bot nelayan bakal terganggu akibat penambakan laut ketika tinjauan di Kampung Portugis, Ujong Pasir, Melaka. - UTUSAN/SYAFEEQ AHMAD